

UDHËZIM
Nr.250, datë 8.4.2008

PËR ZBATIMIN E VENDIMIT TË KËSHILLIT TË MINISTRAVE NR.261, DATË 27.2.2008
“PËR TRAJTIMIN E PUNONJËSVE QË DALIN TË PAPUNË NGA PROCESI I
RISTRUKTURIMIT TË “ARMO” SHA TIRANË DHE “ALBPETROL” SHA PATOS”

Në mbështetje të nenit 102, pika 4, të Kushtetutës dhe pikës 7 të vendimit të Këshillit të Ministrave nr.261, datë 27.2.2008 “Për trajtimin e punonjësve që dalin të papunë nga procesi i rristrukturimit të “Armo” sh.a. Tiranë dhe “Albpetrol” sh.a. Patos”

UDHËZOJ:

1. Shoqëritë “Armo” sh.a. Tiranë dhe “Albpetrol” sh.a. Patos, në përputhje me legjislacionin në fuqi ngarkohen të kryejnë rristrukturimin e fuqisë punëtore. Drejtoritë e shoqërive Armo” sh.a. Tiranë dhe “Albpetrol” sh.a. Patos të bashkërendojnë punën me Shërbimin Kombëtar të Punësimit të Ministrisë së Punës, Çështjeve Sociale dhe Shanseve të Barabarta, për fillimin dhe vazhdimin normalisht të procedurave të trajtimit të punonjësve që dalin të tepërt nga rristrukturimi.

2. Punonjësit e shoqërive “Armo” sh.a. Tiranë dhe “Albpetrol” sh.a. Patos, që dalin të papunë si pasojë e rristrukturimit të këtyre shoqërive, në zbatim të vendimit të Këshillit të Ministrave nr.261, datë 27.2.2008, në zbatim të ligjit nr.7961, datë 12.7.1995 “Kodi i Punës i Republikës së Shqipërisë”, të ndryshuar, përfitojnë trajtim si më poshtë:

- Shpërblim deri në një vit pagë, për ndërprerje të marrëdhënieve të punës.

- Shpërblimi për vjetërsi është të paktën sa paga e një 15-ditëshi, mbi çdo vit pune të plotë, që llogaritet në bazë të pagës që ekziston në përfundim të marrëdhënieve të punës. Kur paga është e ndryshueshme, shpërblimi llogaritet mbi mesataren e pagës së vitit paraardhës dhe indeksohet. Shpërblimin për vjetërsi e përfitojnë punonjësit që janë në marrëdhënie pune me këto shoqëri jo më pak se tre vjet pa ndërprerje.

3. Për trajtimin e punonjësve sipas pikave 1, 2, 3, 4, e 6 të vendimit të Këshillit të Ministrave nr.261, datë 27.2.2008 për periudhën njëvjeçare të pagesës procedohet:

- Pagesa e punonjësve, që përfitojnë sipas pikës 1 dhe 3, fillon nga data kur punonjësit dalin të papunë dhe realizohet nga zyra përkatëse e punësimit vetëm pas paraqitjes së listave të punonjësve nga “Armo” sh.a. Tiranë dhe “Albpetrol” sh.a. Patos. Në këtë pagesë nuk përfshihen shtesat mbi pagë.

- Në zbatim të pikës 2, personat përfitues kanë të drejtën e trajtimit me pagesë papunësie pas përfundimit të trajtimit sipas këtij vendimi.

Në zbatim të pikës 4, çdo person është i detyruar të paraqesë vërtetim nga dega e tatimeve të rrethit ku ka vendbanimin. Personat që vetëpunësohen ose punësohen gjatë periudhës së trajtimit sipas këtij vendimi duhet të bëjnë deklaratë në zyrën e punësimit për të ndërprerë pagesën; në të kundërt detyrohen të zhdëmtojnë shumën e përfutur padrejtësisht.

- Për të përfutur të drejtën e trajtimit sipas kritereve të këtij vendimi, punonjësit që dalin të papunë duhet të paraqesin në zyrën përkatëse të punësimit këto dokumente:

- Librezën e punës, ku të shkruhet shkaku i ndërprerjes: “Dalë i papunë nga rristrukturimi i shoqërive “Armo” sh.a. Tiranë ose “Albpetrol” sh.a. Patos, sipas vendimit të Këshillit të Ministrave nr.261, datë 27.2.2008;

- Libreza e punës të jetë e firmosur dhe vulosur nga ish-punëdhënësi, drejtori i drejtorisë së përgjithshme/rajonit/zonës/filialit të shoqërive “Armo” sh.a. Tiranë ose “Albpetrol” sh.a. Patos, pranë të cilit ka qenë i punësuar punonjësi përkatës.

- Vërtetim nga organet tatimore të rrethit, ku të shënohet nëse punonjësi kryen ose jo aktivitet privat;

- Certifikatën e gjendjes familjare.

- Pagesat për punonjësit realizohen me listëpagesa të veçanta në datat që përcaktohen nga zyra e punësimit, e cila nga ana e saj harton dhe listëpagesat e veçanta për çdo periudhë.

Një kopje të këtyre listëpagesave zyra e punësimit ia dërgon drejtorisë së përgjithshme/rajonit/zonës/filialit të shoqërive “Armo” sh.a. Tiranë ose “Albpetrol” sh.a. Patos jo më vonë se 5 ditë të punueshme përpara datës së caktuar për pagesën e punonjësve.

- Në rast mosparaqitjeje të përfituesit në datën e caktuar, paga e tij arkëtohet jo më vonë se brenda 5 ditëve, duke filluar nga dita e kryerjes në fakt të pagesave.

4. Në zbatim të pikës 6, fondet e nevojshme për kompensimin e punonjësve dhe detyrimet për sigurimet shoqërore e shëndetësore, përpara përfundimit të procesit të privatizimit, të mbulohen nga likuiditetet e shoqërive “Armo” sh.a. Tiranë ose “Albpetrol sh.a. Patos. Për këtë qëllim drejtorja e përgjithshme/rajonit/zona/filiali të shoqërive “Armo” sh.a. Tiranë ose “Albpetrol” sh.a. Patos, brenda dy ditëve të punueshme nga data e marrjes së listëpagesave, të transferojë fondin në degën e thesarit të çdo rrethi, për llogarinë e zyrës së punësimit.

5. Për zbatimin e këtij udhëzimi ngarkohen shoqëritë “Armo” sh.a. Tiranë, “Albpetrol” sh.a. Patos.

Ky udhëzim hyn në fuqi menjëherë dhe botohet në Fletoren Zyrtare.

MINISTRI I EKONOMISË, TREGTISË
DHE ENERGJETIKËS
Genc Ruli